



• EDITORIAL • RÂL VÊNGTU • CHHÛNGKAW CHANCHIN

- » Interserve (India) Mission Seminar
- » Synod Press khawl thar Pathian hnênah hlan a ni
- » ATC Thuthar » Praise On 2017

RNI 68092/83 Regn. No. N.E. 1024
 From
 Synod Literature & Publication Board
 Synod Office, Aizawl - 796 001
 Mizoram. Phone: 0389-2324590

SYNOD *Newsletter*

Volume XXXII

No. 408

E-mail: synodnews@gmail.com

SEPTEMBER, 2017

LÂWRKHAWM

MPF ANNUAL GEN. MEETING

Mizoram People Forum (MPF) chuan September 22, 2017 (Zirtâwpni) dâr 11:00 a.m.-4:00 p.m. khian Synod Conference Centre, Aizâwlah Annual General Meeting a hmang dâwn a. Constituent member-te palai tîr tûra a ngen an nih angin Mizoram Synod OM chuan heta kal tûr hian mi 10 a ruat.

PRESBYTERY INKHÂWPUI

Kohhran rorêna Inkhâwpui pawimawh Presbytery Inkhâwpui chu October chawlhkâr khatna (Nî 5-8,2017) khian hman a ni dâwn. Tûnah hian Mizoram Synod hnuai, Mizoram chhûngah Presbytery 39, Mizoram pâwn - Pastoral hnuai 6, Mission hnuai 8, a vaiin Presbytery 53 a awm mek.

RAM PUM HUAP BEIHPUI

Synod Revival Committee bul tum, inthlan pui lo awm tûr thlîra 'Ram pum huap beihpui' thawh hnihna chu thingtlâng lama kohhran hrang hrangah thlâk zêl a la ni. 'Ram chu Lalpa ta a ni' tih thupua hmanga beihpui thlâkah hian Aizâwl khawpui chhûngah chuan thupui sawituah Minister leh Kohhran Upate hman an ni ber a; thingtlâng lamah chuan Synod Revival Speaker-te hman an ni thung. Kohhran mipuiin an hlut hle.

PASTOR NUPUI TE HRIATTIRNA

Mizoram Presbyterian Kohhran Pastor Nupuite Intawh khâwm chu October 12, 2017 (Ningani) khian Synod Conference Centre-ah neih a ni leh dâwn a. Pastor nupuite chu kal theuh tûrin kan insâwm leh a ni e. Sâwmna lehkhâ hmu lote pawhin hei hi sâwmnaah ngaiin kal theuh i tum ang u.

Lalroluahi
 Secretary

Presbyterian Pastor Nupuite Intawh khâwmna

www.mizoramsynod.org

ZÛIN MIZOTE A NGHAWNG DÂN ZIR CHIANNAIN NGAIHVEN A HLAWH

August 28, 2017 (Thawhtanni) chawhnu dâr 1:00 khan Synod Social Front buatsaih lehkhâw tê pahnih - 'Zûin Mizote min nghawng dân zir chianna' leh 'Political Education Paper' te chu Synod Conference Centre, Aizâwlah Synod Moderator, Rev. Lalzuithangan a tlangzarh a. MLPC Act, 2014 hman hnuia zu chungchâng zir chianna hian mipui ngaihven a hlauh hle a, ni tin chanchinbuahte pawh zir chianna thil lo lang thenkhatte chhuah a ni hlauh. Zir chianna hian damdawi in thil chhinchhiah te, Mizoram sawrkar hnuai Mizoram Police and Excise & Narcotics record te, mi thlan bik zawhna chhantîrte chu hmanruaah hman a ni a, zawhna chhângtute hi khawpui mi 524 leh thingtlâng mi 348, an vaiin 872 an ni a; mipa 586 leh hmeichhia 286 an ni bawk. Zir chianna lo langte chu a tlangpuiin hetiang hi a ni:

1. Mizorama zu kaihnawih thihna thlen dân: Zû vânga thihna thlen dân hre chiang tûr hian Aizâwl khawpui chhûnga damdawi in thlan bik pali - Aizâwl Civil Hospital te, Synod Hospital, Durtlâng te, New Life Hospital te, Aizâwl Hospital & RC te thil chhinchhiah bih chian a ni a. Hêng aţanga a lan dân hian kum 2013 chhûnga Hospital-a mitthi awm zawng zawng za zêla 16.32 te chu zu hman sual kaihnawih thihna a ni a, hei hi kum 2014-ah chuan za zêla 9.86-ah a tla hniam a, sawrkârin zu zawrh phalna a pêk hnu 2015-ah za zêla 17.19-ah a chho leh a, kum 2016-ah phei chuan 23.38% lai a lo tling chho ta a ni. Kum 2016-ah hian heng damdawi in palia thi zawng zawng 1,501 zînga 351 chu zu kaihnawih natnaa thi an ni.

2. Zu kaihnawih pawh khawihna thlen dân: Dan bawhchhiatna leh pawh khawihna thleng thîn hi zûin khawtlâng nun a tihchhiatna langsar tak a ni a. Mizoram Police leh Excise & Narcotic Department te chhinchhiah dân chuan kum 2014 chhûng khân zu kaihnawih dân bawhchhiatna leh pawh khawihna thu buai 2,995 a awm a, hêngte zînga 2516 zet te chu mana tântîr an ni. Kum 2015-ah thu buai 2,541-a tla hniamin, tântîr zât erawh 2,752-ah a pung chho thung. 2016-ah chuan thu buai hi 1,833-ah tla hniamin, man zât pawh mi 1,619-ah a tla hniam bawk. Thu buai nei leh man zât tla hniam zêl hi a tha lama hmasâwnnaa ngaih theih ni bawk mah se, a hmaa dân bawhchhiatna kha MLPC Act hnuai a hmaa thu buai ang chi tam tak chu thu buai ziah luh ngai lo a lo ni tâk vâng a ni

thei. Eng pawh ni se, zû hi khawtlânga pawh khawihna leh dân bawhchhiatna thlentun lian tak chu a ni tih chiang takin a lang a ni. Hêng bâkah hian chhûngkuua harsatna a thlen nasat dân hi chu sawi leh chuan vak ngai lovin a tuartu chhûngkuua leh thenawm khawvêngten chiang taka an hriat theuh a ni.

3. Zawhna leh chhanna lama lo langte: A chung lama târ lan ang khian zawhna chhâng tûr hi mahni ngaih dân sawi chiang ngam tûra beisei, mi 872 an ni a. A buaipuitu tûr bik mi ruat (Study team) chuan ngaih dân hrang hrang lăk khawmte chu zawhna inzûl deuhvah chuan National Family Health Survey 4 (NFHS 4) nêna khaihkin pawhin chhân dân a inan tlangpui avângin rin tlăk thawkhatah an ngai. Amaherawhchu 'Zu in Mizote a nghawng dân zir chianna' a ni tih hriat reng a tha âwm e. Zawhna an chhân dân aţanga thil langsar zualte chu hêngte hi a ni:

- (1) Puitling chin za zêla chhûta 18 zet in zû an in a, mipa zîngah 34.58% zet in an thîn a. Hetih lai hian hmeichhe zîngah zu in hi 1% vêl an ni.
- (2) Zu in mi zîngah hian kâr khata wavi thum/wavi li in an tam ber a (30.52%). Hemi dawtah hian thil tih ho nikhuaa in ve thîn 24.42% an awm a; 22.26% te chu ni tina in thîn an ni. Thil langsar tak pakhat chu hmeichhe zu in thînte zîngah thil tih ho nikhuaa in ve thîn hi 28.57% lai an ni. Zu in thîn sim tawh hi za zêla 2.33 chauh an awm.
- (3) Zu in mi tam ber (65%) chu kum 16-25 inkâr an nih laia in tan an ni a, kum 16 leh 30 inkâr nih laia zu in tan hi 76.76% an ni. Kum 31 leh hnu lama zu in tan hi 13.22%

Phek 2-naah chhuzawm...

SYNOD Newsletter

EDITORIAL STAFF

Rev. Dr. C. Chawngmingliana
Rev. PC Pachhûnga
Upa H. Ronghâka
Rev. R. Laldinthara

Editorial

ZAWH LOH NGHAWNGKAWL

Beihrial hi kum 1918 aţang khân kan hmang ţan a. Kan hman hun erawh chu tih danglam fo a ni a. January thlaah te, September thlaah te leh October thlaah te hman ţhin a ni. Tûnah hi chuan September thlaah kan hmang ta zêl a. Nakkum 2018 hi Beihrial kum 100-na champhaphâk a ni a. A hman dân tûr pawh Synod Executive Committee-in ruahmanna pawh a siam nual tawh a. A hman dân tûr chipchiar erawh chu kohhran mal kutah dah a nih hmêl e.

Beihrial hman hun hmasa lamah chuan kristian la ni lote beih nân te, ringtu intihchak tawn nân leh ringtute sawh ngheh nân te hman ţhin a ni a. Mizorama ringtu hmasate chuan an hlâwkpuî (hlâwkthlâk ni lovin) hle ţhin nghe nghe a ni. Kum 100 a lo vei meuh chuan Beihrial hun kan hman ţhin hi ngaihtuah chian a ngai ta hle mai.

Ram leh hnamin kawng hrang hrangin hma a sâwn zêl a. Eizawn dân phung te, ni tin khawsak dân leh chhûngkaw kalphung te a lo danglam ta hle a. Hetianga hun lo inthlâk danglam zêlah hian Beihrial bul ţan lai ang khân tûnlaiah hian kan hlâwkpuî viau zêl tho nge, kan tlin ta mang lo zâwk tih hi ngaihtuah tham tak a ni ta. Synod Programme a nih vânga hman loh tawp aiah a serh thian ang lekin kan hmang ta mai em a tih theih rum rum mai. Tûn hmaa kan la tih ngai loh - KTP te, Kohhran Hmeichhia te, Pavalai Pâwl te leh Masihi Sangati pual te siamin Beihrial kan hmang ta zêl mai. Tûnlai hunah hian thla khat chhûng ngawt mai zan tina Beihrial Programme hman hi kan la thatpuî zêl dâwn nge, kan tlin ta meuh lo va, zawh loh nghawngkawl a ni ta zâwk mah tih hi ngaihtuah tham tak a ni ta.

Phêk 1-na zawm...

chauh an nih lain, kum 16 tlin hmaa in ţan hi 10.02% an ni bawk.

(4) MLPC Act 2014 hmanga Mizorama zu zawrh a lo ni ta hian zu in a tipung sawt nge, pung chuang lo tih hi zawhna lian tak pakhat a ni. Ngaih dân pawh a inrual lo hle. Tûna zu in mêt zâ zêl a 83.37 chu 2014 hma lam a in ţan an ni a; 8.53% chu kum 2015-a in ţan an ni.

(5) Mi chi hrang hrang, dinhmun hrang hrang leh eizawna chi hrang hrang vuantute zînga zuin hmun a khuar dân zir chianna aţ ang a lan dân chuan kawppui (nupui/pasal) then tawhte zîngah zu in mi an tam ber a. Hêng mite zînga za zêla chhûta 26.12 zet chu zu in mi an ni a. Hei hian a kaihhnawih nia lang chu nupa inţen chhan pawh hi zû vâng bawk a ni thei.

(6) Eizawna hrang hrang vuantute zîngah hna hnuaihngung zâwk thawk, mi hnuai inhlawhfa leh ni tina inhlawh ţhin za zêla 42 chuangin zû an in tih hmuh chhuah a ni. Zû hian kan society-a mi harsa deuh zâwk leh dinhmun hniam deuh zâwk te a nghawng na deuh bik niin a ngaih theih a. Zû hi retheihna leh retheih leh zualna thlentlu lian tak a ni tih a chiang.

(7) Mizote zîngah zu ruih vânga chhûngkaw buaina leh harsatna hi a tlanglâwn viau mai. Hemi chungchâng hre chiang tûr hian zu in leh in lo pawh huam vekin zawhna thenkhat zawh an ni a. Zawhna chhângtu zawng zawng zînga 40.6% zet chuan harsatna an lo tâwk tawh ţhin a, la tâwk ve lo 59.4% an awm bawk. Harsatna an tawh zîngah hian inhniat buaina leh inrem lohna hi a tam ber a (69.79%). Mizo chhûngkuah zû hian nasa takin inrem lohna leh inhniatna a thlen ţhin tih chhângtu zâtve dâwn (40% chuang)-in hetiang harsatna an tawh aţang hian a lang thei.

(8) Zûin harsatna a thlen zînga langsâr tak pakhat chu nupa inţenna hi a ni. Chhângtu zînga 13.4% zet chuan anmahni chhûng emaw, laina hnaite zîngah zu in leh ruih vânga nupa inţen an awm tawh thu an sawi.

(9) Zu leina man atâna sum sêno zât zawhna chhângtu za zêla 40.75% chuan thla khatah

Rs.1,000/- aia tlem an sêng a; za zêla 68 chuan Rs.2,000/- hnuai lam an sêng ţhin bawk. Chutih lain, za zêla 19.30% chuan thla khat chhûngin zu manah Rs.3,000/- chung lam an sêng ţhin.

(10) Zu kaihhnawih avânga natna leh inenkawlina sêno zawhna chhângtu hmun thuma thena hmun khat dâwn (29.21%) te chuan Rs.10,000/- ai tam an sêng ţhin. Zu in mi chhûngkuate hian zu leina sêno bâkah a kaihhnawih natna enkawl nân sum thahnem tak an sêng ral ţhin a ni tih a hriat theih.

(11) Mi mal nun a nghawng dân chhuinaah zawhna chhângtu 75% vêt zetin, zû avângin hrehawm an tih ţhin bâkah an inthiam lo hle. Chhângtu za zêla 43 chu zan hmasa thil thleng hre lo khawpin an rui ţhin a. Zu ruih vângin 22% zette chuan anmahni mai bâkah mi dang an ti palh a. Zu kaihhnawih natna avângin 13% chu casualty/emergency-a kalpuî ngai an ni a, za zêla 10 vêt pheî chu zû avângin hospital-ah admit an ngai hial a ni.

(12) Zûin Mizo Society a nghawng dân hriatna tûra zawhna chhângtu zawng zawng deuh thaw, 93.81% chuan zû hian kan khawtlâng nun a tichhia an ti a. Za zêla 86 zet chuan zu thlah zalên hian ruihlo dang a tihtlêm phah chuang lo niin an ngai. Zûin mipat hmeichhiatna hman sualna a thlen nia ngai 59.86% an awm bawk. Za zêla 52.87 chuan zû hian hmeichhia leh naupangte himna nasa takin a tichhia niin an ngai a, khawtlâng inlungualna tichhia ngai 43.69% an awm bawk.

(13) Zu khap leh tihzalên chungchâng zawhna chhângtu tam ber (63.30%) chuan khap bur mai hi ţa an tih lain 26.03% te chuan thlah zalên mai ţa an ti a, ngaih dân nei lo 10.67% zet an awm bawk.

He zir chianna kalpuî a nih dâwn hian Synod Social Front chuan member pasarih awmna Study Team a din a, anni bâkah hian mi thiam pahni phungbawmah sâwm an ni. Study Team hian a hmuna kala chian tak tak tûr, investigator eng emaw zât an ruat leh a, hêngah pawh hian tawn hriat nei ţa leh mi thiam ruat an ni. Hetiang taka zir chianna a nih avâng hian belh chian a dâwl hle.

SL & PB RAWNGBRAWLNA

Synod Literature and Publication Board chuan Kawrthah Bialah August ni 18-21 khân Literature Seminar an hmanpuî. SL&PB aţang hian, Executive Secetary i/c SL&PB Rev. P.C. Pachhûnga te, Editor Rev. Dr. C. Chawngmingliana te leh Tv. K. Lalrinzuala, Synod Office te an kal. July ni 19 (Inrinni) hian Kawrthah Kohhranah nilêngin Literature Seminar hi hman a ni a. Seminar-ah hian mi 200 vêt an tel a, Kohhranhoten an hlut thiam hle. Inrinni zân aţanga Pathianni zân thlengin Bial chhûng Kohhran hrang hrangah insem darhin hun hman a ni.

August 26, 2017 (Inrinni) khân Vêngnuai Bialin Vêngnuai Kohhran Hall-ah Bial huapin Literature Seminar an buatsaih bawk a, SL&PB aţangin Addl. Editor Upa H. Ronghaka leh Rev. K. Lalpiangthara, Former Editor-ten an hmanpuî. Seminar-ah hian mi 196 lai an kal thei a, kham lo takin an hmang.

Hêng Seminar-ah hian chawhma lamah 'Literature pawimawhna leh Thuziak rawngbawlna' tih leh chawhna lamah 'Kohhran ţawngkam hman leh Hla thu lam dân chungchâng' tih thupuite zir ho a ni.

Râl Vêngtu

Mite chu Râl Vêngtu hnênah an lo kal khâwm leh tak tak a.

Mite: Râl Vêngtu, mi thenkhat hian *Adhaar Card* leh sakawh hi an sawi zawm a. ‘Sakawh nambor 666 chhinchhiaha nei lo te chu lei leh hralh phal a ni lo vang tih ang khân *Adhaar Card* nei lo te chuan thil an leiin an hralh thei dawn lo’ ti te’n an sawi a. ‘*Adhaar Card* hi sakawh chhinchhiaha ang a ni a, kohhran chuan kan hnâwl ngam tûr a ni’ an ti baw a. Min hrlh fiah deuh loh chuan kan buai ta riau mai.

Râl Vêngtu: Hmeichhe bum fin theih loh tih zawng zawng in nei zo dawn alâwm. Hetianga thu fahrah têt têt hmanga mi bum chîngte hi kan Bible-in ‘*an hraxk chu thlân inhawng a ni a; an kam chhûngah rûl tûr a awm a. An kawngah chuan boralna leh hrehawmna a awm a, thlamuanna kawng pawh an hre lo’* a tihho kha an ni a. An dang nâlah in tawh thlu palh ang e, fimkhur hle ang che u. Sakawh leh *Adhaar* hmech bel tum chu changêl-a sâwi bel tum ang chauh a ni. Ngun takin lo ngaihthla rawh u aw:

1. Sakawh nambor chu digit 3 chauh a ni a. *Adhaar Card* nambor erawh chu digit 12 lai a ni.

2. Sakawh nambor chu pakhat chauh a awm a, chu chu 666 a ni. *Adhaar Card* nambor erawh chu chi hrang hrang a ni a, nambor inang pakhat mah a awm lo.

3. Sakawh nambor chu a neitu apiangin nambor ngai 666 an inthawm a. *Adhaar Card* nambor erawh chu a inthawm ve theih loh va, *Adhaar Card* neitu apiangin nambor hran an nei vek.

4. Sakawh nambor nei chauhvîn thil lei leh hralh thei tûra sawi a nih laiin *Adhaar Card* nei leh nei lo ten thil an leiin an hralh thei vek.

5. *Adhaar Card* hi ram vên himna atân leh mipuite tâna awlsam zâwkna tûra sawrkâr programme a ni a. Sakawh hi chu sawrkâr programme a ni ve lo.

Mite: Râl Vêngtu, i thu sawi chu a fiahna a Chiang hle mai, ngaihthla takin kan va haw ta’ng e.

UPA ORDINATION CERTIFICATE CHHUT THAR CHUNGCHÂNG

Kohhran hming ziah dân pawm thar a nih avângin Upa Ordination Certificate chhut thar a ni a, Presbytery tin Secretary hnênah thawn a ni a, lo hmu lo palh kan awm chuan Synod Office-ah ngaihven theih a ni e.

Sd/- Upa Lalrinmuana
Superintendent
Synod Office

www.mizoramssynod.org

SYNOD HOSPITAL, DURTLÂNG JULY, 2017 CHHÛNGA THILPÊK DAWNTE

I. CHARITY FUND

1. Thianzaho, Aizawl Vênglai	Rs	20,000/-
2. Ramhlun Kohhran, Aizawl	Rs	50,000/-
3. Lungdai Kohhran	Rs	1,000/-
4. Cherhlun Bial Kohhran Hmeichhia	Rs	2,000/-
5. Zemabâwk Kohhran Hmeichhia	Rs	5,000/-
6. Sihphîr Bial	Rs	20,000/-
7. Tlungvêl Gate Vêng Kohhran	Rs	4,000/-
8. Pu Hniarmanga leh a chhûngte, Ramhlun 'S'	Rs	7,000/-
9. Zonuan Bial Kohhran Hmeichhia	Rs	5,000/-
10. Zothanpuia, Zârkawt	Rs	3,500/-
11. Upa Lalrinliana Sailo, Lêngpui	Rs	5,000/-
12. Kolasib Project Vêng Kohhran	Rs	5,000/-
13. KTP, Vênghnuai Bial	Rs	10,000/-
14. Phûllên Vêngthar Bial	Rs	5,250/-
15. Pu R. Mângchhûnga, Khanpui	Rs	2,000/-
16. Kawrthah Kohhran	Rs	6,000/-
17. KTP, Tuipuibari Bial	Rs	271/-
18. KTP, Zemabâwk Bial	Rs	10,000/-
19. Sairâng Kohhran	Rs	10,000/-
20. Zotlâng Kohhran Pavalai Pâwl	Rs	3,000/-
21. Pi Krosthang, Ramhlun 'S' — Pu B. Daniela hriatreng nân	Rs	10,000/-
22. Damparengpui Bial	Rs	3,000/-
23. Thingdawl Bial Kohhran Hmeichhia	Rs	20,000/-
24. KTP Meet, Hmârphei Presbytery	Rs	7,000/-
25. Pu Zodinliana, Mission Vêng	Rs	1,000/-
26. Pi Lalhuzaui, Durtlâng Leitan — A pasal C. Lalrotlinga (L) hriatreng nân	Rs	10,000/-
27. Zonuan Kohhran Hmeichhia, Aizawl	Rs	10,000/-
28. KTP, Zuangtui Bial	Rs	10,000/-
29. Zodingliani, Zârkawt	Rs	3,500/-
30. Pu Lalhlamuanipta te chhûng, Sailâm	Rs	1,000/-

II. THISEN PETE

1. KTP, Búngkâwn Vêngthar Branch	42	Units
2. YMA, Seling Branch	42	Units
3. KTP, Leitan Bial	47	Units
4. KTP, Vaivakâwn Bial	41	Units
5. 1 st Battalion, MAP, Armed Vêng	33	Units
6. KTP, Dinthar Vêngthlang Branch	31	Units
7. KTP, Phunchawng Branch, Aizawl	11	Units

PEK ZÂT

42	Units
42	Units
47	Units
41	Units
33	Units
31	Units
11	Units

III. GRACE HOME TÂN

1. Zemabâwk Bial Kohhran Hmeichhia	Rs	5,000/-
2. Durtlâng Bial Kohhran Hmeichhia	Rs	5,000/-
3. Zonuan Bial Kohhran Hmeichhia	Rs	15,000/-
4. MHIP, Durtlâng Branch		Mitthi tuamna puan 52
5. LAD, Zemabâwk Bial		Rs 5,000/-
6. Khatla South Kohhran		Rs 10,000/-

IV. THIL DANG PETE

1. Zaita Bial Kohhran Hmeichhia	Hospital tân	Rs 4,000/-
2. Bethlehem Vênglai Bial Kohhran Hmeichhia	OT tân Refrigerator	leina tûr Rs 20,000/-
3. Ramhlun North Kohhran Hmeichhia	Steel Thleng	100
4. Ramhlun N Bial Kohhran Hmeichhia	Nerve Stimulator	leina tûr Rs 50,000/-
5. Synod Bookroom, Mission Veng	Nursing School	tân lehkhabu chi hrang hrang chi 6
6. Chhawrtui Kohhran Pavalai Pâwl	Thutthlengsei (Bench)	4
7. KTP, Lâmhchîp Branch	Hmunphiah	50
8. Kulikawn Vêngthlang Kohhran Pavalai Pâwl	Compound Samfai leh Sharp Pit laih hnallâng	
9. Zotlâng Kohhran Pavalai Pâwl	Compound Samfai hnallâng	
10. KTP, Ramhlun East Branch	IV Stand	- 12
11. St. Francis of Assisi Parish, Catholic Hmeiche Pâwl, Durtlâng	Thutthlengsei (Bench)	5
12. Pu H.Lalhimpuia, Châmrai, Aizawl	Hospital tân	Rs 10,000/-
13. Châmrai West Kohhran Pavalai Pâwl	Water Cooler	
14. Electric Vêng Kohhran Hmeichhia, Aizawl	Nau neiinna khum lei nân	Rs 40,000/-

Khawngaihna leh duhsakna thilpêk min petute zawng zawng hnênah Lalpa Isua Krista hmingin lâwmthu kan sawi tak meuh meuh a ni. Hêng in thilpêk kan dawnte hian damlo awm man harsate thlamuang takin a awmtir a, Hospital mamawh tam tak min phuhrûksak baw a ni.

Sd/- REV. R. RAMDINMAWIA
Chaplain

SYNOD BOOKROOM, BAWNGKÂWN BRANCH BUILDING THAR

Aug. 28, 2017 khân Synod Bookroom Building thar, Bâwngkâwn Biak In hnuai mi chu Synod Executive Secretary, Rev. PC Pachhûnga'n a hawng. Hawna inkhâwm hi Bialtu Pastor G. Chhunthuama'n a kaihrui a, Upa R. Lalmalsâwma, GM-in a sak dan a report a report.

Synod Bookroom, Bâwngkâwn Branch chu a hmunin a zawh tawh loh avângin PRESCOM leh Bâwngkâwn Kohhran

Committee-in Bâwngkâwn Kohhran Biak In hnuai pum pui chu Synod Bookroom luah tûrin an ti a. Bookroom thar hi a dung 45ft a sei niin a vâng hi 19 ft a ni a, cheng nuai sâwm leh palî sênga sak a ni. Bookroom building thar sakna atân hian Bâwngkâwn Kohhran pawhin tha leh sum eng emaw zât an sêng a. A hmaa Bookroom atâna hman thîn chu Stockroom atân hman chhuzawm a ni.

INTERSERVE (INDIA) MISSION SEMINAR

Interserve (India) chuan Synod Mission Board hriatpuiin Aug. 23, 2017 khân Synod Conference Centre-ah thalaita pualin Mission Seminar an buatsaih. Session liah thenin thupui hrang hrang – ‘*What on Earth am I doing?*’ ‘*What's getting in my way?*’ ‘*Wholistic Mission*’ leh ‘*My Compass*’ tih te zir ho a ni a, zawhna leh chhânna hun hman a ni

baw.

He Seminarah hian Interserve (India), Pune lam atângin an hruiate Cyril Georgeson te, Binu Varghese te leh Pu John Lalremruata te an lo kal a, Aizawl Theological College leh Missionary Training College te, khawpui chhûng Bial KTP hrang hrang te leh mi sâwm bikte an tel.

DELHI MIZO PRESBYTERIAN CHURCH INKHÂWMNA SAWN

Delhi Mizo Presbyterian Church (DMPC) chuan January 26, 2016 atânga an inkhâwmna thîn, Hotel South Gate hnuai chu chawhma lama an inkhâwm hunah, he hotel neitute hian mi mal hnênah September, 2017 atângin booking an lo pe tih an hria a. Inkhâwmna tûr nei lova awm ngawt thei nia an inhriat loh avângin hmun an zawng ta a. Believer's Church Biak In, Hauzkhas, Green Park ep (opposite) chu Believers Kohhran chuan chawhnu dâr 2:30 – 7:00 thleng, a man panggai chanvea luah an lo phalsak hlauh mai a. Committee room pakhat luah belhin August 27, 2017 chawhnu dâr 2:30-ah he Biak Inah hian an inkhâwm tân ta. He hmuna inkhâwm hmasak ber hian mi 450 zet an inkhâwm a ni. Delhi-a zirlai leh hna thawk awmtin Kohhrana inkhâwm an ngaih pawimawh tial tial avânga pun lam an pan zêl thu leh lâwmawm an tih thu kan dawng.

SYNOD PRESS KHÂWL THAR PATHIAN HNÊNA HLÂNNA

Sept. 6, 2017 khân Synod Press khâwl thar Digital Printing Set te chu Pathian hnênah hlân a ni a. Hlanna inkhâwm hi PRESCOM General Manager Upa R. Lalmalsâwma'n a kaihuai a, Synod Press Manager Pu Lalhruitluanga Râltê-in report pe-in khâwl thar chanchin a sawi fiah a. Synod Executive Secretary Rev. P.C. Pachhûnga'n khawil tharte chu Pathian hnênah a hlân a ni.

Synod Press-in khâwl thar an neihte chu hêng te hi an ni :

1. Color Printer: Konica Minolta siam Bizhub C258 model a ni a, A3 size color printer a ni. Hei hi Offset khâwla chhut tham si loh khabu kâwm leh certificate leh thil dangte chhutna a ni.
2. Digital Duplicator: Duplo Corporation siam, Duprinter DPA 120 a ni a, thil chi hrang hrang a chhut theih bákah a thát bíkna chu thil chhah deuh pawh a chhu zar zar thei a, Pathian Ram Thawhlâwm Ip chhut nân a thá hle dáwn a ni.
3. Auto Creaser: Autoprint Company siam Maxx Model a ni a, he khâwl hi lehkhabu kâwm keu nawm nâna creasing siam nân te, lehkhá pawh bun awlsam nâna chhun chikna atân te leh sticker paper half-cut nân te hman theih a ni.
4. Comb Binder: Excelam company siam, A4 size lehkhabu eng emaw bík, project report te, photo album te, calendar te leh thil dang puah khâwma thûina khâwl a ni.
5. Laminator: Hei hi lehkhá pawimawh leh certificate te him taka dah thát a nih theih nâna sarâng fim hmanga tuam thátna khâwl a ni.

PES TEACHERS' TRAINING BUATSÁIH A NI

August 24, 2017 hian Aizâwl leh a chheh vêla Presbyterian English School (PES)-te pualin Teachers' Training Programme, Synod Conference Centre-ah buatsáih a ni a, Director Rev. B. Sângthanga Exe. Secretary a ni.

He Training hi Session li-ah thên a ni a, Session 1-naah Upa Dr. H. Lalthanzâra ziaak, "Co-operation" zir ho a ni a, Session 2-naah Upa Lalthianghlimna ziaak, "Scheme of Examination and Question Design," Session 3-naah Pu Lalvêna Hnamte ziaak, "Teaching Method" te zir ho a ni. Session IV chu General Discussion atân hman a ni.

Ngai teh, tlângte din chhuak a, thli siam a, mihring hnênah chuan a ngaihtuahna eng nge ni tih sawi chhuah sak a, zing chu tithim a, lei hmun sângte chiltu chu a hming LALPA, sipaihote Pathian chu a ni si a.

Amosa 4:13

AIZAWL THEOLOGICAL COLLEGE THU THAR

- Principal Rev. Prof. C. Lalhlira chu United Theological College (UTC) Society, Bengaluru, Annual General Meeting (AGM), August 9-10, 2017 khân Mizoram Presbyterian Kohhran aiawhin a tel a. UTC chhúngkaw thil rêl a ni ber a. Principal Rev. Dr. JR John Samuel Raj pawh a term a tâwp dáwn tawh a, a aiawhtu túra nikum 2016 AGM-in a thlan Rev. Dr. Chilkuri Vasantha Rao chu September 29, 2019-a dah ngheh túra rêl a ni.
 - August ni 18, 2017 khân PCI General Assembly Theological Sub-Committee-ah Rev. Prof. C. Lalhlira leh Rev. Prof. K. Lallâwmzuala te an kal. PCI hnuai Theological College pahnih - Aizâwl Theological College leh John Roberts Theological Seminary-te thawh dun dân túr ruahmanna an siam a, hei hi PCI Theological Committee-in a la ngaihtuah leh túr a ni.
 - October 31, 2017 khian Calvin Study Centre, Aizâwl Theological College chuan kum 500 kal taa Kohhran Siamthata 'Protestant Reformation' tia hriat lâr tâk bul tantu Martin Luther-a'n Wittenberg Biak Ina '95 theses' a târ hriatreng nân Chanmari Kohhranah Seminar buatsaih a tum. He Seminar hi Chanmari Kohhranin a thleng ang. Heta tel túr hian Kohhran hruaitu emaw zât sâwm an ni a, mi 300 vèl zet tel túra beisei an ni. Kohhran siamthata chungchâng zir ho a ni ang.
- He Kohhran Siamthata denchhen hian Aizawl Theological College chuan thupui hrang hrang insemin Seminar neihpui a nih hnuah lehkhábu chhuah an tum bawk.

PRAISE ON 2017

Synod Information and Publicity chuan Central KÏP hriatpuina-in kumin 2017 hian **PRAISE ON** a buatsaih leh dáwn a, kumin chuan **Group zai intihsiaakna** a ni ang a, Khatla Kohhranin an thleng ang.

He show PRAISE ON 2017 hi zaia Pathian rawngbâwlka kawnga Kohhranin hma kan sâwnna leh zaia Chanchin Thá puan darhna atân te, thilung leh tih tak zeta Pathian faka zai mi kan lo pun zêl nân te, helama talent neite phochhuahna remchâng kan lo neih nân leh Hruaina Êng TV Channel hmasâwnna atân te a buatsaih túr a ni.

Praise On 2017 show pumpui hi Hruaina Êng TV channel ah tihchhuah túr a ni ang a, Third Round leh Final Round te chu Live-telecast tum a ni bawk.

Praise On 2017 atâna hriattúr thil te:

1. KÏP Branch pakhat aţangin group pakhat aia tam tel theih a ni ang a, Branch KÏP hminga tel remchâng lo tân Bial KÏP hminga tel theih a ni bawk ang. A tel túr thlan leh a zât túr chu Branch OR Bial Committee thu a ni ang.
2. Group pakhat member 3 - 8 (Pathum aţanga pariat) thleng an awm thei ang.
3. A tel túr group-a member-te chu KÏP member Kohhran dân zawhkim, Kohhran dân chhúnga awm an ni túr a ni.
4. A tel túr te chu September 15, 2017 ral hmain Synfo Office, Synod Office Annexe-ah ziaakin thelhut túr a ni a, Group member zât leh hming, Bial/Branch hming leh contact No. te ziah tel túr a ni.
5. Intihsiaaknaah hian Pathian fakna hla, Mizo ţawnga sak túr a ni ang a, Kristian Hla bu a mi hla sa túr te tân chei kual vak a rem lovang.
6. Round zawnin hla ngai sak phal a ni lo.
7. Round hrang hrang result puan hun leh Round sâng zâwka lút túr zât chu la inhriattír leh túr a ni ang.
8. Lâwmmman :
 - a) Pakhatna - Rs. 1,00,000/-, Pahnihna - Rs. 50,000/-, Pathumna - Rs. 30,000/-, (+ Trophy leh Certificate)
 - b) Top 10 chin tân Consolation Prize a awm ang a, a remchân angin Special Prize siam tum a ni bawk.
9. Intihsiaak hun:

a. Audition Round	:	Sept. 26-30, 2017 (Chhun)
b. Second Round	:	October 11-13, 2017 (Chhun)
c. Third Round	:	November 2&3, 2017 (Zan)
d. Final Round	:	November 21 & 23, 2017 (Zan)
e. Final Result Puan	:	November 24, 2017 (Zan)